

leed, datt dat méi spéit ginn ass. Déi war administrativ net esou schnell gelaf, wéi se hätt solle lafen. Also et freet, fir hei dann e puer Explikatiounen ze ginn.

Éischtens wëll ech dem Här Berger soen, datt mer 2000 en Audit gemaach hu vum CITA. En Audit, dee sengerzäit gewisen huet, datt de CITA en technologesche System wär, deem op an evolutiv wär, an deem och sengerzäit all déi Perspektive festgeluecht huet, déi mam CITA kéinten erreecht ginn, esou datt ech net mengen, datt elo momentan en zousätzlechen Audit eis vill géif bréngen.

Ech wëll awer soen, datt momentan de CITA, esou wéi en e konzipiéiert ass, haaptsächlech als e Sécherheetsystem fonctionnéiert, deem eis erlaabt, op deene sensibele Plazen, wou en eng lwwer-waachung, eng Surveillance mécht, extrem schnell reaktiv ze ginn, anzegräifen, d'Sécherheetskräften dohinner ze schécken, dann, wann eppes virkënt, dann, wa mer se brauchen. An dat ass och déi essenziell Fonctioun, vun där ech mengen, dass de CITA se an enger éischer Etapp muss erfüllen.

An deene leschte Joren ass am CITA vill dru geschafft ginn, fir déi nei Deeler - d'Saarstrooss 2003, d'Nordstrooss 2007, dat, wat mer opgemaach hunn -, an haaptsächlech déi Équipements électromécaniques an déi Sécherheet an den Tunnelen, déi bäikomm sinn, esou ze integréieren, datt mer och do dat an deene Formen integréieren, déi eis déi Reaktiounen erlaben, déi mer mussen hunn, wa Sécherheetsfroe sech géife stellen.

Elo sinn awer selbstverständlech an Zukunft eng Rei Développementer méiglech an noutwendeg - oder noutwendeg a méiglech; wéi Der et wëllt huelen.

Et muss ee wëssen, datt an deenen nächste Joren och de CITA nach wäert zousätzlech chargéiert gi mat der Surveillance vum Tunnel Grouft, vum Tunnel Stafelter, vum Tunnel Micheville, wat och wesentlech grouss elektromechanesch Systemer sinn, wou d'Sécherheet muss kontrolléiert a surveilléiert ginn, datt mer och an der Fro vun der Verbreederung vun den Autobunne mat enger Gestiou vun dem öffentleche Verkéier, deem op d'Standspuren deemno wéi ka lafen, och wäerten de CITA an Zukunft fuerderen, datt mer iwwert de CITA en elektromechanesch System hunn, deem den öffentleche Verkéier deemno wéi op de Standspuren opmécht. Och dat ass eng Gestiou, eng Missioun, déi de CITA an Zukunft muss iwwerhuelen.

Dat, wat Dir gemengt hutt, dat ass, datt ee kann op de Brëtellen haaptsächlech, wann eropgefuer gëtt, och d'Mise en place vun enger Rei Signalisationssystemer maachen, fir, wa Stauen op der Autobunn sinn, d'Leit net eropzeloossen. Och dat ass eng Evolutioun, déi méiglech ass. Se gëtt awer eréischt richteg sënnvoll, wann een och ka soen, wann d'Autobunn voll ass, wou den Automobilist da soll hifueren, wat fir en anere Wee e soll huelen. Or, dat ass net ëmmer zu Lëtzebuerg an deem Sënn méiglech, well, wann d'Autobunn verstoppt ass, och normalerweis déi aner Weeër souwisou och verstoppt sinn, esou datt et zwar sënnvoll ass als Informatioun, mä net ëmmer als Verkéierleedungssystem, well dat schwéier en place ze setzen ass.

Et muss och um CITA eng Refonte vum Réseau de transmission gemaach ginn. Do si mer mam ACL an engem relativ gudden Kontakt an och amgang ze kucken, fir all déi Informatiounen op de GPS bei d'Leit ze kréien, well dat nach méi schnell effikass ass wéi d'Annoncen op den Entréeën vun den Autobunnen. Ech denken, datt mer do och relativ kuerzfristeg wäerte kënne Resultater hunn.

Schlussendlech muss och nach de Remplacement scho vun deene vétusten Equipementer gemaach ginn.

Den Audit ass do, an all déi Aarbechten, déi an deenen nächste Jore mussen kommen, sinn och relativ kloer determinéiert. Mir wëssen, wou mer wëllen higoen. Mir wëssen, wat mer solle maachen, mä et ass enorm vill an der Evolutioun, wat do muss gemaach ginn.

Duerfir hu mer an deem Ponts-et-Chaussées-Gesetz, wat mer an deenen nächsten Deeg wäerten hei an der Chamber déposéieren - et ass elo schonn duerch de Conseil gaangen -, och virgesinn, datt d'Administratioun opgestockt gëtt zu deem néidege Personal, wat mer brauchen, fir déi do Saachen ze maachen.

Haaptsächlech, an dat ass dat Wesentlech, ass an deem Gesetzestext virgesinn, datt eng nei Divisioun geschaaft gëtt bei de Ponts et Chaussées, déi dann haaptsächlech als Missioun huet, sech also

spezifesch ëm d'Exploitation vum der Grande voirie an d'Gestion du trafic ze bekëmmern.

D'Ponts et Chaussées ass net nëmme eng Administratioun, déi Stroosse baut, mä muss méi wéi jee an Zukunft eng Administratioun sinn, déi och an der Gestion du trafic eng wesentlech Roll ze spillen huet.

Merci.

» M. le Président. - Merci, Här Minister Wiseler. Domat, Dir Dammen an Dir Hären, ass dës Punkt vun eise Ordre du jour ofgeschloss. Mir kommen zum nächste Punkt, dat ass d'Diskussioun iwwert de Projet de loi 5903, eng Direktiv iwwert de Schadstoffregister. D'Wuert huet elo de Rapporteur vun dësem Projet, den honorebelen Här Negri.

7. 5903 - Projet de loi

a) concernant certaines modalités d'application et la sanction du règlement (CE) N°166/2006 du Parlement Européen et du Conseil du 18 janvier 2006 concernant la création d'un registre européen des rejets et des transferts de polluants et modifiant les directives 91/689/CE et 96/61/CE

b) portant création d'un registre national des rejets et des transferts de polluants

c) modifiant l'article 15 de la loi modifiée du 10 juin 1999 relative aux établissements classés

Rapport de la Commission de l'Environnement

» M. Roger Negri (LSAP), rapporteur. - Här President, Dir Dammen an Dir Hären, wéi wäit kënne mer d'Loft, d'Waasser an de Buedem belaaschten, ouni der Gesondheet vum Mënsch an der Natur ze schueden?

A wat fir engem Mooss kënne mer Offäll vun enger Plaz op déi aner transportéieren, ouni doriwwer Rechenschaft ofleeën ze mussen?

D'Zil vun dem Projet de loi vun haut ass et, dës Problematik an de Grëff ze kréien. Heifir gëtt vun der Europäescher Kommissioun no enger harmoniséierter Method en europäesche Register geschafen, deem opgrond vun engem nationale Register oder Inventaire, wann Der esou wëllt, all Joer zesummegeallt gëtt.

De Projet de loi 5903 huet zwar nëmme véier Artikelen, schreift sech awer, wéi aus deem grad Gesoten ervirgeet, a méi e breeden ëmweltrelevante Kontext an. Zënter Jore verfolgegt d'Europäesch Unioun eng Politik, déi als Zil huet, déi Emissiounen vu staark ëmweltschiedleche Substanzen besser ze kontrolléieren an ze reduzéieren, an dës enger unifizierter Form, déi derfir suert, dass et innerhalb vun der Europäescher Unioun net zu Wettbewerbsverzerrungen kënnt.

D'EU-Regelunge konzentréieren sech dobäi engersäits op e Katalog vu Schuedstoffer wéi zum Beispill Treibhausgasen, Schwéiermetall oder kribberregend Stoffen, an anersäits op bestëmmten industriell Aktivitéiten, déi a besonneschem Mooss fir esou Emissiounen responsabel sinn. Hei ginn Technologien agesat, déi permanent evoluéieren, an duerfir mussen mer eis Gesetzgebung regelméisseg upassen, fir mat dëser Entwécklung Schrëtt ze halen.

Här President, de Projet de loi 5903 erméiglecht déi Prémissen hei zu Lëtzebuerg ëmzesetzen, an domat d'Bestëmmung vum EU-Reglement 166/2006 anzehalen. D'EU-Reglement gesäit vir e Register ze schafen iwwert d'Emissiounen, respektiv den Transfert oder den Transport vun ëmweltschiedleche Stoffen. An deem Kontext gëtt och d'Kommodo-Inkommodo-Gesetzgebung geännert.

Ulass fir dës EU-Reglement waren zwee international Accorden. Éischtens, d'Aarhus-Konventioun vum 25. Juni 1998, déi de Bierger e systematescht Recht op den Zougang zu Ëmweltinformatiounen an op d'Participatioun gëtt, mat der Méiglechkeet rechtlech Schrëtt ze ënnerhuelen, fir dës viru Gericht anzekloen. Zweetens huet d'europäesch Gemeinschaft am Mee 2003, zesumme mat der UNO, e Protokoll ënnerschriwwen, fir e gemeinsame Register vum Ausstouss respektiv Transfert vu Schuedstoffer ze schafen.

Allgemeng gëtt dës Protokoll PRTR-Protokoll genannt, vum engleschen „Protocol on Pollutant Release and Transfer Registers“. Den europäesche Register, deem am Kader vum EU-Reglement 166/2006 de 7. Februar 2006 geschaf gouf, geet iwwert dat eraus, wat de PRTR-Protokoll virschreift, well en eng Rei vu Substanzen matabezitt, déi scho virdrun iwwer aner EU-Gesetze eng wichteg Roll spillen, zum Beispill am Beräich vum Waasserschutz. Ausserdeem si verschidden Délaie méi streng ugeluecht, fir dass d'Bierger och an der Praxis e reellen Afloss op d'Schuedstoffpolitik huele kënnen.

(M. Jos Scheuer prend la Présidence)

De Register, dee geschaf gëtt, ass fir d'EU-Staten näischt komplett Neies. De PRTR-Register ersetzt dee bestehenden EPER-Register „European Pollutant Emission Register“. Dat iwwerschnitt sech mat den Aktivitéiten, déi schonn an der sougenannter IPPC „Integrated Pollution Prevention and Control“-Direktiv festgehalen goufen, mä geet awer och doriwwer eraus. De PRTR-Register ëmfaasst deemno méi Substanzen a méi Typen vun Aktivitéiten.

Här President, de PRTR ersetzt also den aktuellen EPER-Register duerch de PRTR-Regime, dee fir d'Éischt 2009 publizéiert gëtt op Basis vun den Donnéeën vum 2007. Aus wat bestinn dann elo déi Haaptënnerscheeder zu deem aktuellen EPER-Register, par rapport zu deem neie PRTR-Register? Éischtens, d'Unzuel vun de Schuedstoffer, déi gemellt mussen ginn, gi vu 50 op 91 eropgesat. Zweetens, d'Unzuel vun elo 56 IPPC-Aktivitéiten ginn op 65 eropgesat. Drëttens, niewent den Emissiounen an d'Loft, an d'Waasser, sinn am PRTR och elo d'Emissiounen an de Buedem unzeginn. Véiertens, de PRTR gëtt elo all Joer à jour gesat, anstatt wéi bis elo all dräi Joer beim EPER. Fënneftens, nei derbäi kënnt d'Erfaasse vum Transfert oder den Transport vun Offäll vum Betriebsstanduert bei Quantitéiten vun zwou Tonne pro Joer fir geféierlech Offäll, an 2000 Tonne pro Joer bei net geféierlechen Offäll. Sechstens a leschtens, nei ass och d'Bedelegung vum Public fir Informatiounen ze kréien am Sënn vun der Aarhus-Konventioun.

Nei Betriber, déi am PRTR par rapport zum aktuellen EPER derbäikommen, si Steecarriären a Kläranlagen, wa se 100.000 Awunnergläichwäerter dépasséieren. Fir Lëtzebuerg ass dat déi Beggener Kläranlag fir d'Stad Lëtzebuerg an d'Émgéigend. Hei zu Lëtzebuerg sinn domat 44 Betriber fir dat éischt Referenzjoer 2007 am PRTR betraff, an dat mat 49 Aktivitéiten.

Dat sinn am Detail fënnf Energiezentrale mat sechs Aktivitéiten, 17 Metallverarbeitungsbetriber mat 21 Aktivitéiten, sechs Steebroch- a Carrièresbetriber, zwee Chemiebetriber, fënnf Müll- a Kläranlagen, een Holzverarbeitungsbetrieb, sechs intensiv Schwéngszuchbetriber, ee Mëllechproduktionsbetrieb an ee Betrieb mat „Traitement de surface“ vu Materialien.

Här President, den Haaptgedanken, ëm deem et bei dësem Projet de loi geet, ass jo fir propper Loft, proppert Waasser a proppere Buedem ze suergen. Fir lech eng Iddi ze ginn, wou d'Grenzwaerter vun den Haaptschuedstoffer am Beräich Loft, Waasser a Buedem leien, déi der Europäescher Kommissioun via den nationale Register gemellt mussen ginn, wëll ech lech e puer vun deenen Haaptschwellenwaerter ernimmen, déi pro Aktivitéit oder pro Betrieb bei enger Aktivitéit net dierfen dépasséiert ginn.

Éischtens, am Beräich Loft, do sinn et manner wéi 100.000 Tonne pro Joer fir de Kuelendioxid, CO₂ also, 100.000 kg pro Joer fir d'Stickoxiden, 50.000 kg pro Joer fir de Feinstaub, de PM₁₀, zéng bis 200 kg pro Joer fir verschidde Schwéiermetaller. Hei als Beispill, fir de Quecksëlwer sinn dat zum Beispill zéng Kilo pro Joer, an dann e lescht Beispill, fir d'Loft 0,1 Gramm pro Joer fir Dioxinen a Furanen. Zweetens, am Beräich Waasser sinn dat manner wéi 2.000 Tonne pro Joer fir d'Chloriden, 50.000 kg pro Joer fir de Gesamtstéckstoff, 200 kg pro Joer fir d'Zomm vum Benzol, Toluol, Ethylbenzol a Xylol, ofgekierzt BTEX, an als lescht Beispill 0,1 Gramm pro Joer fir Dioxinen a Furanen. An dann drëtten a leschte Beräich, am Buedem sinn et manner wéi 50.000 kg pro Joer fir de Gesamtstéckstoff, zéng bis 100 kg pro Joer fir verschidde Schwéiermetaller. An hei erëm erausgegraff de Quecksëlwer, beim Quecksëlwer am Buedem ass dat ee Kilo pro Joer, an als lescht 0,1 Gramm pro Joer fir Dioxinen a Furanen.

Här President, wéi fonctionnéiert dann elo an der Praxis d'Transmissioun vun den Donnéeën vum Exploitant, fir den nationale Register opzestellen an doraus deem europäesche Register? D'Exploitant vum

deene 44 Betriber notifiéieren all Joer hir Donnéeën, soit un d'Ëmweltverwaltung, soit un d'Waasserwirtschaftsverwaltung, en fonction vun hire respektiven Aktivitéiten. Duerno koordinéiert d'Ëmweltverwaltung dës Donnéeën an e Registre national, deem all Informatiounen fir de Registre européen enthält. D'Ëmweltverwaltung ass domat och den USPriegspartner a responsabel vis-à-vis vun der Europäescher Kommissioun fir d'Fiabilitéit vun den Donnéeën.

D'Donnéeën iwwert d'Schuedstoffer an den Transfert vun Offäll ginn op elektronischem Support an enger transparenter Form publizéiert. Den Avis dozou gëtt a véier Dageszeitungen publizéiert, déi et dem Public erlaben während mindestens engem Mount déi néideg Informatiounen ze fannen an, wann néideg, zousätzlech Donnéeën oder Informatiounen vun der Ëmweltverwaltung ze froen.

Am Registre national mussen folgend Donnéeën obligatoresch stoen: Éischtens, den Numm vum Betrieb an de Standuert. Zweetens, d'Aktivitéit vum Betrieb. Drëttens, de Propriétaire respektiv den Exploitant oder d'Sociétéit. Véiertens, d'Zort vu Schuedstoffer oder Offäll, jee nodeem. Fënneftens, a wat fir engem Distanzberäich d'Schuedstoffer rejetéiert ginn, a sechstens, d'Destinatioun vun den Offäll déi transportéiert gi sinn.

Mat Hëllef vun der europäescher Ëmwelt-agence stellt d'EU-Kommissioun der Öffentlichkeit dës Informatiounen a Form vun engem harmoniséierte Register zur Verfügung. Fir den Zougang méiglechst einfach ze halen, gëtt, wéi gesot, dës Datenbank iwwer Internet publizéiert. Am Prinzip ginn all Informatiounen veröffentlecht, esou wéi et an der Aarhus-Konventioun virgesinn ass. Wann awer eenzel Informatiounen, aus rechtliche Grënn, net kënne publizéiert ginn, muss dee betraffene Stat d'EU-Kommissioun dorop opmierksam maachen an de Grond fir dës Confidentialitéit uginn.

Här President, Lëtzebuerg muss, wéi déi aner Staten och, eng éischeité Keier all dës Donnéeën bis Mëtt, allerspëtstens bis Enn dëses Joers 2009 eraginn, wéi gesot mat de Referenzwaerter vum Joer 2007.

An der Ëmweltkommissioun sinn eng Rei Froen opkomm, well den zätleche Kader, fir d'EU-Bestëmmungen anzehalen, relativ kuerz ass. Esou mussen d'Betriber hir Donnéeën bis spëtstens den 1. März 2009 eraginn hunn. Vum Ministère krute mer awer verséichert, dass d'Betriber en Deel vun deenen Donnéeën scho weiderginn hunn an dass och kuerzfristeg nach Réuniounen mat deene betraffene Betriber virgesi sinn, fir sécherzestellen, dass alles an deene gefuerderten Délaieen oflaffe kann. Och um informativen Niveau mussen déi néideg Adaptatiounen schnell gemaach ginn, fir dass dat Ganzt klappt.

Eng aner Fro betrëfft d'Sanktiounen. D'EU-Reglement schreift vir, dass all Memberstat Sanktiounen virgesäit fir déi Betriber, déi sech net un déi nei Modalitéiten halen. Dës Sanktiounen ginn am Artikel 3 vum Projet de loi festgehalen. Si betreffen awer net nëmme d'Dispositiounen aus dem EU-Reglement, mä no enger Propos vum Statsrot och d'Dispositiounen aus deem betreffende groussherzogleche Reglement. Zum Zäitpunkt, wou d'Ëmweltkommissioun de Rapport ugeholl huet, louchen hir dës Ausféierungsbestëmmungen awer nach net vir.

Mir hunn an der Ëmweltkommissioun dorop insistéiert, dass dës Reglement mam neie Gesetz gläichzäiteg a Kraaft triede soll. Mir kruten an deem Sënn Satisfaktioun, dass de Règlement grand-ducal gëschter vun eise Ëmweltminister Lucien Lux an der Ëmweltkommissioun presentéiert gouf, a mir soen him duerfir Merci.

Als Rapporteur sinn ech frou, dass mir dës Projet de loi der Chamber innerhalb vun engem kuerzen Délai virléeën konnten, well d'Prozeduren, déi hannerdru kommen, schnell ulafe mussen. Konkret ausgedréckt, huet eisen Ëmweltminister dës Projet de loi den 9. Juli 2008 deponéiert. Den 11. November 2008 huet d'Chamber den Avis vum Statsrot kritt. Virdrun haten och d'Chambre des Métiers, d'Chambre de Travail an d'Landwirtschaftskummer hiren Avis ofginn, woubäi se allen dräi mam Projet de loi d'accord waren. D'Ëmweltkom-

missioun huet dës Dokumenter dunn direkt den 19. November analyséiert an de 15. Januar 2009 ass de Rapport vun der Ëmweltkommissioun ugeholl ginn.

Domat ginn ech den Accord vu menger Fraktioun zu dësem Projet de loi a soen lech Merci fir d'Nolauschteren.

» **Plusieurs voix.** - Très bien!

» **M. le Président.** - Merci, Här Negri. Den éischten ageschriwwenen Diskussionsriedner ass den Här Marcel Oberweis. Här Oberweis, Dir hutt d'Wuert.

Discussion générale

» **M. Marcel Oberweis (CSV).** - Merci, Här President. Här President, Dir Dammen an Dir Hären, Här Minister, am Ufank wëll ech dem Rapporteur, dem honorabelen Här Roger Negri, Merci soe fir säin nun dach wirklech ausféierleche schrëftleche Rapport an och elo mëndlech virgedroene Rapport. Do war bal alles dran. Dat war, wéi Dir sot, staark.

Mat dësem Gesetzesprojet, mat deem mir eng weider europäesch Direktiv ëmsetzen, maache mir och e weidere Schrëtt a Richtung vun der nohalteger Entwécklung vun onser Gesellschaft. Dass de Beräich vun der Protektioun vun onser Ëmwelt ëmmer méi an de Mëttelpunkt vun onsen Diskussiounen eraréckelt, gesäit een un dësem Gesetzesprojet, deen elo schonn de Règlement grand-ducal aus dem Joer 2006, ganz genee vum 31. Juli, ausser Kraaft setzt. De Register, PRTR genannt, baséiert op deeneselwechte Prinzipie wéi den EPER. Hie verlaangt awer nach méi Informatiounen iwwer Schuedstoffer, iwwert d'Aktivitéite vun onse Betriber a méi Informatiounen fir de Public.

An dësem Zesummenhang wëllt d'Europäesch Kommissioun, an enker Kooperatioun mat der Europäescher Ëmweltagence vu Kopenhagen, all Informatiounen iwwert d'Emissiounen, och aus diffuse Quellen, an de PRTR ophuelen. Et ass net ëmmer einfach, diffus Quellen ze erfaassen, mä hei gëtt awer e weidere Schrëtt gemaach, fir dat ze erreechen.

D'Haaptelement an dëser europäescher Direktiv stellt ouni Zweifel an den Ae vun der CSV den Accès vun den Ëmweltinformatiounen fir de Bierger duer. Et ass wichtig, dass d'Bierger opmierksam gemaach ginn op d'Schied, déi eventuell duerch d'Betriber an aus diffuse Quellen op si erafale kënnen. Hinne mussen all déi relevant Informatiounen aus de sozialen, de gesondheetschiedegenden an de wirtschaftleche Beräicher zougänglech gemaach ginn. Dat ass jo eng Fuerderung vun der sougenannter Aarhus-Konventioun, déi mir virun zwee Joer ënnerschriwwen hunn.

Doriwwer mussen awer all Ustrengungen ënnerholl ginn, fir d'Bierger nach méi fir hir Ëmwelt ze sensibiliséieren. Esou kënnen mir derfir suergen, dass d'Agrëffer op ons dräi

Liewensressourcen, dat ass de Buedem, d'Loft an d'Waasser, wuel net op null reduzéiert kënnen ginn - dat kënnen mer net maachen, soss misste mer all Aktivitéiten astellen -, mä mir musse se reduzéieren.

Fir dass sech awer ons Betriber dësem Gedanken nach méi unhuelen, soll dee Register geschafe ginn, an deen all d'Polluanten ageschriwwen ginn, déi op déi dräi Liewensressourcen awierke kënnen. Dat sinn all Dreifhausgasen. Dat sinn d'Polluanten, déi de sauere Reen erviruffen. Dat sinn déi Substanzen, déi ons Ozonschicht verdënne. Dat sinn d'Dioxinen an d'Furanen an doriwwer eraus och d'Schweiermetaller.

Deen nationale PRTR-Register muss sech dofir streng un d'Virgabe vun dem europäesche PRTR ulehnen, fir dass déi Donnéeën an den Datebanken och matenee verglach kënnen ginn. En effet, all déi Informatiounen, déi aus de Betriber no bausse gedroe kënnen ginn - ech soen: kënnen ginn -, mussen op engem Internetsite dem Public gratis zur Asiicht virleien.

Et ass hei wichteg drop hinzewiesen, dass d'Bierger an engem fréie Stadium och agebonne kënnen ginn, andeem si hir Observatiounen, hir Informatiounen, hir Analysen an och Avisë kënnen erandroen. A wann ee weess, dass sech mëttlerweil scho 44 Betriber mat ronn 49 verschiddenen Aktivitéiten hei bedeelegen, da kann een d'Ampleur vun der europäescher Direktiv moossen. De Rapporteur ass do am Detail op déi eenzel Punkten agaangen. Ech erspueren lech dat hei an der zweeter Lecture dann.

De PRTR huet awer och nach eng weider Komponent. Duerch hie soll derfir gesuergt ginn, dass an de Betriber alles ënnerholl gëtt fir d'Ëmweltbelaaschtung dauerhaft ze reduzéieren. Dat geet iwwert d'Recherche an iwwert den Développement. An do kënnen och ons Universitéit an ons CRPe mat agespaant ginn.

Wann ee sech de Gesetzesprojet genau ukuckt, da gesäit een an der Annex 1 eng ganz Rei vu Betriber, déi an dës Direktiv falen. Et sinn der méi wéi am EPER virdrun. Duerfir mécht et och elo Sënn, all Betriber ze encouragéieren, notamment déi, déi mengen, si kéinte sech hei eraushalen, sech verstärkt fir den Ëmweltschutz anzesetzen. Genau wéi si dat maachen am Beräich vun der Protektioun vun hire Mataarbechter a vun de Mënschen. Dat ass gutt esou, well soss missten a mussen déijéineg, déi no ons kommen, an engem duebele Mooss derfir blechen oder belaauscht ginn.

Well de Rapporteur Roger Negri op all déi aner Punkte vun der Direktiv wirklech am Detail agaangen ass, wëll ech dann zum Schluss kommen. D'CSV-Fraktioun steet zu dësem Gesetzesprojet aus dem Beräich Ëmweltschutz an ech bréngen och hiren Accord mat eran a soe Merci fir d'Nolauschteren.

» **Plusieurs voix.** - Très bien!

» **M. le Président.** - Merci, Här Oberweis. Den nächste Riedner ass den Här Eugène Berger.

» **M. Eugène Berger (DP).** - Merci, Här President. Léif Kolleginnen a Kollegen, ech wëilt dem Rapporteur och Merci soe fir säin ausféierleche mëndlechen a schrëftleche Bericht. Et ass net einfach, fir nom Rapporteur an och nom Marcel Oberweis zu esou engem Sujet nach vill Neies bäizedroen.

Et ass gewosst, dass et also hei ëm d'Exekutioun vun engem europäesche Règlement geet. Am Fong vun der Saach si mer eis sécherlech alleguerten eens an dat kann och eis Zoustëmmung fannen. Haapt-sächlech wëilt ech nach eng Kéier erausträichen, dass hei och deen Aspekt vun der besserer Informatioun oder Méiglechkeet vun Informatioun vum Bierger am Ëmweltberäich soll garantéiert ginn. Dat ass eng gutt Saach, eng richtig Saach, déi mer ënnerstëtzen.

Op där anerer Säit eben och, dass hei d'Betriber sech bewosst musse sinn, dass se mussen all déi Donnéeën eraginn, fir eben dee klore Register kënnen opzestellen vun de Polluanten, déi an d'Loft, an d'Waasser oder an de Buedem kënnen gelaangen.

Ech wëilt mech op zwou, dräi kleng Remarqué beschränken, déi déi praktesch Ëmsetzung betreffen, hei zu Lëtzebuerg haupsächlech. Dat ass op där enger Säit, dass mer knapp Délaïen hu fir dat elo ëmzesetzen - dat ass och scho gesot ginn - an dass een also muss wëssen, dass hei d'Verwaltungen mussen fit gemaach ginn, respektiv ass dat och ëmgedréit d'Fro: Sinn d'Verwaltungen fit, hu si dat néidegt Personal fir dat kënnen schnell an effizient ze maachen, well si och vill aner Aarbechten hunn?

Dat hunn ech schonn hei op der Tribün gesot: Bei all neier Direktiv gesi mer jo, et ass fir aner Länner vläicht, déi honnerte vu Beamten hunn, kee Problem, wann eng nei Direktiv muss ëmgesat ginn. Hei zu Lëtzebuerg, mat deene wéinege Leit, déi mer an der Verwaltung hunn, déi awer ganz effizient schaffen, kënnt all Kéiers eng zousätzlech Belaaschtung op eis zou.

Dozou dann déi konkret Fro, wéi mer personalméisseg dofir gerüst sinn.

Eng zweet Remarque ass eng, déi och mat der Ëmsetzung respektiv mat der Organisatioun vun deem Ganzen hei zu Lëtzebuerg ze dinn huet. Et ass jo esou, dass d'Betriber hei mussen déi Polluanten am Endeffekt un zwou Verwaltungen weiderginn: déi eng, déi zoustänneg ass fir d'Waasser, déi aner an zwar d'Ëmweltverwaltung, fir de Rescht. Ech mengen, dass dat keng gutt Saach ass, éischstens net am Sënn vun der Simplification administrative, vun där jo vill geschwat gëtt, mä och net am Sënn vun der Saach insgesamt.

Et muss ee sech also iwwerleeën, ob et net awer méi sënnvoll wier vun der Saach, awer och vun de Prozeduren hier, wann dat Waasserwirtschaftsamt och an den Environnement géif integréiert ginn. Ech mengen, dass ass och eng Saach, mat där sech wahrscheinlech d'Parteien an deenen nächste Wochen a Méint sollen ausenansetzen, fir an Zukunft dann ze kucken, wa mer hei zu Lëtzebuerg nom 7. Juni d'Land oder d'Departementer nei organiséieren, fir dass een do dann och géif dat Waasser-

wirtschaftsamt op déi Plaz zrëckféieren, wou et higeiéiert, nämlech an den Environnement.

Dës Remarque gemaach, wëilt ech awer den Accord vun eiser Fraktioun zu dësem Projet de loi abréngen.

Ech soen lech Merci.

» **Plusieurs voix.** - Très bien!

» **M. le Président.** - Merci, Här Berger. Et ass kee Riedner méi ageschriwwen. D'Regierung huet d'Wuert.

D'Regierung verzicht op d'Wuert. D'Diskussioun ass domadder ofgeschloss a mir kommen dann zur Ofstëmmung iwwert de Projet de loi 5903. Den Text steet am Document parlementaire 5903'.

Vote sur l'ensemble du projet de loi et dispense du second vote constitutionnel

De Projet de loi 5903 ass eestëmmeg ugeholl mat 59 Jo-Stëmmen, ouni Abstentioun an ouni Nee-Stëmm.

Ont voté oui: Mmes Sylvie Andrich-Duval, Nancy Arendt, M. Lucien Clement (par M. Marcel Oberweis), Mmes Christine Doerner, Marie-Josée Frank, Marie-Thérèse Gantenbein-Koullen, MM. Marcel Glesener, Norbert Hauptert, Mme Françoise Hetto-Gaasch, MM. Ali Kaes, Paul-Henri Meyers, Laurent Mosar (par Mme Martine Stein-Mergen), Marcel Oberweis, Gilles Roth, Patrick Santer, Marcel Sauber, Jean-Paul Schaaf, Marco Schank, Marc Spautz, Mme Martine Stein-Mergen, MM. Fred Sunnen, Lucien Thiel, Lucien Weiler (par M. Norbert Hauptert) et Michel Wolter (par M. Patrick Santer);

MM. Marc Angel, Alex Bodry (par M. Roger Negri), John Castegnaro (par M. Roland Schreiner), Mme Claudia Dall'Agnol, M. Fernand Diederich, Mme Lydie Err, MM. Ben Fayot, Jean-Pierre Klein, Roger Negri, Jos Scheuer, Romain Schneider, Roland Schreiner et Mme Vera Spautz;

MM. Eugène Berger, Xavier Bettel, Mme Anne Brasseur, M. Fernand Etgen, Mme Colette Flesch, MM. Charles Goerens, Paul Helminger, Alexandre Krieps (par M. Fernand Etgen), Claude Meisch et Carlo Wagner;

MM. Claude Adam, François Bausch, Félix Braz, Camille Gira (par M. Claude Adam), Jean Huss (par Mme Viviane Loschetter), Henri Kox et Mme Viviane Loschetter;

MM. Gast Gibéryen, Jacques-Yves Henckes, Jean-Pierre Koepp et Robert Mehlen;

M. Aly Jaerling.

Gëtt d'Chamber d'Dispens vum zweete Vote constitutionnel?

(Assentiment)

Et ass also esou décidéiert.

Dir Dammen an Dir Hären, mir sinn um Schluss vun der Sitzung ukomm. Mir komme muer de Mëtteg nees zesummen um hallwer dräi.

D'Sitzung ass opgehuewen.

(Fin de la séance publique à 16.53 heures)

Chamber TV



Chambre
des Députés
L U X E M B O U R G

um Réseau vun der Eltrona / Siemens (imagin)

um Kanal S40 / 455.25 Mhz

um Réseau vun der Coditel

um Kanal S 29

och an der Rediffusioun all Sëtzungsdag vun 19:00 Auer un